

「性比較容易，但愛很難。」 / 文：珠珠、詩詩

八十後嘅阿倩係一個短髮、皮膚白皙嘅女仔，性格開朗健談。佢從事記者工作，依家同男朋友同居。

態度親切嘅阿倩抱住「無咩所謂」嘅心態同我地「談情說性」。我地問佢好多問題：『你對性嘅觀念嚟自邊度？』，『你最深刻嘅感情係點樣嘅？』『當中有咩快樂同痛苦嘅經驗？』『如果段關係可以重新嚟過，你希望會有咩改變？』

一問一答嘅過程中，阿倩同我地一齊重溫佢過去嘅青春歲月……

阿倩記得中學時老師唔會公開談論性，「經期同夢遺係有嘅……但性？就有咩印象嘞」。阿倩對性嘅睇法更多係嚟自文學同電影。我地諗返自己細個，都係俾好多電影同電視嘅愛情畫面吸引，覺得好好奇，對愛情有好多幻想。但現實又係唔係咁呢？

阿倩話開心嘅經歷當然有過。大學一年級時佢識咗之前個男朋友，個男仔當時休學一年到阿倩學校附近開書店。「當時覺得佢好有想法，為我打開咗一個全新嘅世界。」

男朋友之後去奧地利交流，阿倩想要一條施華洛世奇嘅頸鍊。於是男朋友喺當地嘅華人餐廳打黑工洗碗。出糧嗰晚冰天雪地，男朋友收工之後踩單車趕去施華洛世奇嘅鋪頭，但已經閉咗門。「佢一個人企喺櫥窗前面睇咗好耐……」

依家阿倩有經濟能力，可以為自己買施華洛世奇頸鍊。「但已經唔重要……最重要嘅回憶留咗喺心裡面。」

回憶有開心，亦有牽掛。之後幾年，阿倩同男朋友都係「遙距戀愛」。首先係阿倩去咗新加坡做交換生，然後男朋友喺上海某間出版社工作，之後又去咗北京。兩個人靠寫信講電話維持感情。

阿倩畢業後去北京搵男朋友。諷刺嘅係，一齊住並冇拉近彼此嘅距離，反而令兩個人喺生活上好多磨擦。「我唔開心因為覺得自己進入唔倒佢嘅世界，唔夠了解佢。」

唔夠兩年，阿倩發現男朋友同另一個女仔一齊，當時自己有一種「被背叛同欺騙嘅感覺」。但其實第三者嘅出現只係導火線。

阿倩發現自己同男朋友唔係好夾，更重要係睇倒自己性格上嘅矛盾。「我喜歡浪子型嘅男仔，但一齊之後又想對方關心自己，唔會成日去流浪，對穩定嘅關係有需求。」

依家諗返轉頭，阿倩發現愛以及性喺一段親密關係當中都幾重要，但愛就遠比性複雜，更需要學習。「性係相對容易，但愛係比較難。咩嘢係愛呢？當時我地又識唔識愛對方呢？直到依家我都唔知道。」

### 採訪後感

「重嚟一次？我諗結局唔會變。有啲人注定相遇、相愛、糾纏、分開。重要係做自己，為自己嘅路而努力。」

聽完阿倩咁講，我地好認同。要明確了解自己同伴侶究竟係點，真係唔容易。好多時我地鐘意一個人，咩都可以俾佢，將所有心機放喺佢身上，都有諗過有其他嘢其實同樣重要，例如學業、朋友。

其實愛同生活係相輔相成，正如阿倩講：『人必生活，愛才有所依附』。要做返自己，同時去愛；唔好將愛情睇得咁重，眼界先會開闊。